



Les Pharisiens presentent à Iesus la femme adultere pour le surprendre : mais par sa sapience ils sont renuoyez à leur confusion.

INSI qu'au point du iour Iesus vint au Temple pour enseigner, les Scibes & Pharisiens luy amenerent vne femme surprise en adultere, & l'ayant mise au milieu, luy dirent : Maistre, cette femme-cy a esté surprise commettant adultere. Or en la Loy, Moysé nous a commandé de lapider celles qui sont telles : toy donc qu'en dis-tu ? Or disoient-ils cela, le tentant afin qu'ils eussent dequoy l'accuser comme infracteur de Loy, s'il la vouloit absoudre; ou comme inconstant & leger s'il la vouloit iuger. Mais Iesus s'inclinant en bas escriuoit du doigt en terre. Et comme ils perseueroient de l'interroger, il se dressa, & leur dit : Celuy de vous qui est sans peché, iette la premiere pierre contre elle. Et de rechef s'estant abaissé il escriuoit en terre. Or quand ils oyrent cela, estans repris par leur conscience, ils sortirent vn à vn, depuis le premier iusques au dernier, tellement que Iesus demeura seul avec la femme qui estoit au milieu. Adonc Iesus se dressa, & ne voyant personne fors la femme, il luy dit, Femme, où sont ceux qui t'accusoient ? Nul t'a-il condamné ? Et elle dit, Nul, Seigneur. Et Iesus luy dit, Je ne te condamneray point aussi; Va, & ne peche plus.